


SELEBRASAUN REKONSILIASAUN nian

(bele hahú hodi fó surat-tahan ida ba labarik ida-idak; iha oin bele tahu dezeńu ida ho Jezús ne'ebé dere odamatan ka tau odamatan ida no momentu tuir momentu bele dere odamatan ida ne'e. Di'ak liu taka dezeńu ka odamatan ho hena no hatudu buat ne'e bainhira lee leitura husi Livru Apocalipse)



G: Labarik doben sira, ita halibur iha ne'e hodi fiar katak Maromak nia laran luak bele leno nakukun hotu-hotu, bele bali kanek hotu, bele nakfilak ita-nia moris. Ita prepara ita-nia an ba momentu ida ne'e hodi hananu:

KANTU:

G: Iha lian latin, liafuan "konfesa" katak "dehan ho lian maka'as, hateten ho konvinksaun". Maibé loloos, saida mak ita dehan "ho lian maka'as" bainhira ita ba konfesa? Ita hateten buat tolu:

1. Ita dehan katak Maromak mak boot no laran di'ak, Nia hatene ita, maski Nia hatene katak ita sala beibeik, Nia hadomi ita ida-idak.
2. Ita rekoñese katak, iha ita-nia hahalok sira, dala barak ita sala, ita rekoñese katak ita-nia hilin sira mak la loos, no ita lori ema seluk ba sala. Ita haka'as an atu sai di'ak liu, liu husi empenhu ki'ik ida, ne'ebé ita sei realiza.
3. Ita hahú ita-nia preparasaun ho salmu ida ne'ebé halo ita komprende katak se ita mesak la bele halo buat ida, maibé ita presiza Maromak nia tulun nafatin.



Salmu 123

Se Na'i la hela iha ita sorin, ne'e Israel nia knananuk.

Se Na'i la hela iha ita sorin, bainhira ema hader hasoru ita hafoin sira sei tolan ita bainhira sira-nia hirus sae.

Hafoin bee suli haleu ami, mota hadulas ami,
bee boot si'ak nadulas, nakonu liu ami ulun.

Rahun diak ba Na'i nebe la hatama ami ba balada sira nehan.
Ami nia tulun iha Na'i nia naran, Ida 'be halo lalehan no rai.

G: Oras ne'e ita rona pasajen Biblia nian ne'ebé sei tulun ita atu prepara an ba Sakramentu Rekonsiliasaun nian:

L: Apoc 3,20

Na'i dehan: Ha'u iha hela odamatan hodi dere odamatan ne'e; se ema ruma rona Ha'u lian hodi loke odamatan mai Ha'u, Ha'u sei tama hodi han ho nia, nia han ho Ha'u.

(momentu ruma nonok)

G: Iha tempu Kuarezma nian, ita haka'as an atu komprende di'ak liután Maromak nia mistériu domin nian, oinsá Nia hadomi ema sira to'o mate iha Kruz, no oinsá nia interpela ita-nia kapasidade atu hadomi ema seluk.

Pasajen badak ida ne'e dehan buat barak: ida-idak koko atu reflète

I MOMENTU: JEZÚS IHA ODAMATAN

Pasajen ida ne'e dehan katak Jezús mai dere ita-nia odamatan:

Ha'u hanoin lai hodi bainhira ha'u ba konfesa dala ikus: iha tempu ida ne'e saida mak halo ha'u sente di'ak? Ha'u halo esperiênsia di'ak ruma? Ha'u hanoin fila fali ba akontesimentu sira, liafuan sira, enkontru sira ne'ebé sai sinál iha ha'u-nia moris katak Jezús hadomi ha'u?

Oras ne'e ha'u agradece Na'i hodi hakerek orasaun badak ida agradesimentu nian

(fó tempu ba labarik sira atu hakerek; bele tau musika neineik atu akompañia momentu ida ne'e, importante mak kria ambiente silénsiu nian)

Hotu ona momentu ida ne'e bele hili knananuk ida ka hinu oratoriu nian atu bele agradece hamutuk Maromak ba ninia laran luak.

II MOMENTU: JEZÚS DERE ODAMATAN

Jezús dere odamatan: iha ita-nia moris Nia mai beibeik atu “fanu” ita bainhira ita la koho tuir Maromak nia dalan. Jezús la kole atu dere: Nia dere dala ida, dala rua, dala tolu atu ita bele hatán ho ksolok ba Maromak nia hakaran.

(se tau odamatan iha oin, ema ruma bele dere husi kotuk)

Nia fó hanoin mai ita oinsá ita bele hatán ba ninia domin no fó ksolok ba Nia. Iha ita-nia moris Maromak oferese oportunidade barak atu bele fó tempu ba Nia hodi sai ninia belun, atu ita bele hametin liután ita-nia domin ba Nia.

MISSA DOMINGU nian: Maromak hakbesik ita, liuhusi ninia Liafuan no liuhusi nia Futar Isin. Hodi simu Nia, ita bele sai ida de’it ho ninia hakaran, ninia hanoin no ninia mehi ba ita-nia moris

KATEKESE ka ENKONTRU iha oratóriu: atu hadomi Jezús presiza hatene Nia; momentu sira ne’e, ne’ebé ita hala’o hamutuk ho kolega sira, tulun ita atu hetan no hasoru Jezús liuhusi Kreda nia fiar no nia tradisaun.

ORASAUN PESOÁL: ita-nia resposta ba Maromak nia proposta sira mai husi ita-nia orasaun pesoál, ida-idak tenke hatán ba Jezús; ita bele refleto nu’udar grupu, maibé depois ida-idak hatudu, iha ninia moris, oinsá nia hadomi Jezús no “ko’alia” ba Jezús pesoalmente nu’udar belun.

Oras ne’e ha’u hanoin ba “tempu no fatin” ne’ebé ha’u fó ba Maromak atu rona ninia Lian: ha’u aproveita iha tempu Kuarezma nian atu lee Evanjellu no atu komprende Maromak nia hakaran? Ha’u hili tempu ruma atu bele reza di’ak liután?

(husik momentu ruma atu labarik sira bele hakerek sira-nia resposta)

(dere tan odamatan)

G: Maromak bolu tan ita... liuhusi maluk sira. Nia mosu iha ita-nia moris liuhusi ema sira nia prezensa: família, kolega sira, edukadór ka mestre sira... Jezús ko’alia mai ita liuhusi sira-nia liafuan sira; Nia interpela ita liuhusi sira-nia hahalok hasoru ita.



Oras ne’e ha’u hanoin ba ha’u-nia prezensa iha família laran: oinsá ha’u hatudu ha’u-nia domin no agrade-simentu ba aman no inan, ba maun, bin no alin sira?

Iha eskola, parokia, oratóriu ha’u hasoru ema barak (labarik hanesan ha’u no mós adultu sira): oinsá ha’u-nia relasaun ho sira: ha’u hatene simu sira hotu tuir sira-nia karakteristika, ka iha ema ruma ne’ebé ha’u la tahan? Ha’u hatene perdua sira ne’ebé halo buat ruma hasoru ha’u?

(husik momentu ruma atu labarik sira bele hakerek sira-nia resposta)

(dere tan odamatan)

G: Maromak hadomi ita no Nia hein katak ita sai boot tuir Ninia dalan. Bainhira ita moris, Nia haraik mai ita kapasidade no talenta sira ne’ebé ita presiza haboot.

Oras ne’e ha’u hanoin oinsá ha’u uza kapasidade sira ne’ebé Maromak haraik mai ha’u? Keta karik ha’u baruk atu serbisu, ka ha’u buka de’it buat ne’ebé bele manán lalais no lahó haka’as an? Iha buat ruma ne’ebé halo ha’u sente mo’e? Saida no tansá? Keta karik ha’u-nia liafuan sira la hatudu katak ha’u mak Maromak nia oan, maibé husi ha’u-nia ibun sai de’it liafuan foer, ka tolok ne’ebé hatun ema seluk nia dignidade no ha’u-nian mós?


(husik momentu ruma atu labarik sira bele hakerek sira-nia resposta)

Kantu: hili knananuk ida ne’ebé espresa ema nia hakaran atu harohan ba Maromak hodi husu Ninia perdaun.

G: Bainhira ita ba konfesa, ita loke odamatan ba Maromak no husik Nia lori domin no damen iha ita-nia moris. Oras ne’e, ida-idak bele hakbesik sakramentu Rekonsiliasaun nian, hodi simu Maromak nia perdaun. (se iha odamatan, bele halo labarik sira liu husi odamatan atu ba konfesa: ho hahalok ida ne’e sira bele komprende katak hodi konfesa sira permite ba Maromak atu hadomi sira)

Konfesa hotu tiha, bele fó ba labarik ida-idak imajen ka stampita ida iha ne’ebé sira hakerek empeñu ida (ki’ik, maibé klaru) ne’ebé sei tulun sira atu kontinua la’o iha Maromak nia dalan no mós, se amlulik hateten buat ruma ba sira, sira bele hakerek konsellu ida ne’e.

Bele mós prepara surat-tahan ida, iha ne’ebé hakerek kuadra ruma husi salmu 50, ne’ebé labarik sira bele lee bainhira konfesa ona, hodi hakerek iha kotuk sira-nia empeñu.



Maromak, sadia ha’u iha Ita-nia laran di’ak, halakon ha’u-nia salan iha Ita laran luak keta hateke ba ha’u-nia salan sira, no hamoos ha’u husi ha’u-nia salan. O Maromak haraik fuan moos ida mai ha’u, Keta hasai Ita-nia Espíritu Santo husi ha’u.

Husi Salmu 50